

Mahraka

محرک

محمد چنگیز خان طریقی

نیویشاک: ڈاکٹر عنایت اللہ فیضی (تمعہ امتیاز)

کھوار ادبو آسمانہ ژاپھیاک ای خور استاری ڈوکو پرائے۔ محمد چنگیز خان طریقی پور سال اسپہ سار جدا ہوئے۔ ہتوغو جدائیو پورنہ کھوار ادب شہوغو ہوئے، وا کھوارو خوش دارک، ای بے مثال ادیبو اوچے شاعرو سرپرستیار محروم ہونی۔

چنگیز خان طریقی موڑکھوو شوگرامہ محمد بیگے قومو طریق اللہ خاندانہ نادر آمان خان لالو ژاوا اوشوئے۔ ہیس ۱۹۴۰ سنا محمد سیرو بطن شوگرامہ غیچ ہوریتائے۔

جو بس شوگرامی بیٹی ریشنوتے کہ گوس کیانی بوئے
زیربلیو بڑوک بیٹی شیر چھینی کہ انگوس کیانی بوئے



چنگیزخان سبقوتے ریشنوتے ہائے۔ شوگرامار ریشن غیچہار پھتوک رے، پورا عمر ریشنوچے شوگرامو موژی کوسیتائے۔ اول طالبعلم، اچی استاذ، وا اخیرا پنشن گناک بیٹی۔ ۲۰۱۲ سالو مارچ مسو اوشٹ تاریخہ، پک تازہ اسپکہ ریشنو بینکا گیتی پنشن گنیتائے، ای جوژاغا پروان پوشیتائے، کورا دعا وا کورا بمبارک اریر۔ ڈاکخانا بی تان اخباران اوچے رسالان گانیتائے۔ دورا بی چائے پی موخینہ نشی رسالہ لوژاوا، اجلو یوشٹ گیتی یارہ پرائے۔ کلمہ رے ہیس تان ژانو ہوروتے حوالہ اریر۔

نشان مرد مومن با تو گویم
چو مرگ آید تبسم بر لب اوست

محمد چنگیز خان طریقی چھترارو سکولہ جوشو جماعتہ سبق راوا شاعریو ولٹی موخ اریر۔ بیس ہے وختہ اسکوردی بحرا شعر ریکا پرائے۔ ہے زمانہ کھوارو ترقیو اولو دور اوشوئے۔ ۱۹۵۷ء چھترارو سکولو پروشٹہ پبلک لائبریریا مشاعرا بی شاعرانان کار اریر۔ چنگیز خان ہتے وخت جوشو جماعتا اسیتائے۔ سردار حزب اللہ خان وزیر اعظمو زمانا چھترارا مشاعرہ بکو بتیرا شرکت اریر۔ ہمی مشاعرین حبیب اللہ فدا، باچہ خان ہما، بابا ایوب اوچے خور شاعران گیاو تانی۔ مشاعران انتظام غلام عمر اوچے وزیر علی شاہ صاحبو ہوستہ باو تائے۔

۱۹۶۵ء ریڈیو پاکستان پشاورا کھوار پروگرام شروع بکو، تان کلامان ریڈیوتے انزیئکہ پرائے۔ ۱۹۶۷ء جمہور اسلام کھوار چاپ بکو تان کلامان ہے رسالا چاپ اریر۔ اول محفی تخلص کوراوتائے، مگم اچہ ہورو پیٹھی تان خاندانی نامو مناسبتہ طریقی تخلص اریر۔ ہورو اولو چاپ بیرو نظمو عنوان اوشوئے "کھوار راور کھوار نیویشور"

اے کھو ژیری کھوار نیویشور
 کھوارو مو روخخور کھوار نیویشور
 کھوارو لوان فار نیویشور
 کھوار راور کھوار نیویشور
 زبانو خوش داراک وطنو خوش داراک
 وطنو خوش داراک ایمانو خوش داراک
 وطنو خوش داراک ایماندار نیویشور
 کھوار راور کھوار نیویشور
 بہدیریو داسستان ہیہ زبان
 تہ تہذیبو ترجمان ہیہ زبان
 تان روایتان قلمو شہسوار نیویشور
 کھوار راور کھوار نیویشور

ای خور نطمو عنوان شیر "زمانہ انقلاب مشکیران"

زمانہ ہنون انقلاب مشکیران
یہ کورمو بچے سباب مشکیران
تبدیلی نو بوئے کلیران ہوستہ
ہے بچے رستم و سہراب مشکیران
زمانہ ہنون انقلاب مشکیران
عیب دی ہنون صفت غیریتائے
بزدلی ہیہ را غیرت غیریتائے
شومی ہیہ را صفت غیریتائے
مہ لوان بیان ای کتاب مشکیران
زمانہ ہنون انقلاب مشکیران
بے گناہ بولو حراسستہ اسور
مجرم ہیہ ہرا حفاظتہ اسور
صحی پریشان ہر حالتہ اسور
فیصلہ پیسہ و کباب مشکیران
مہ قامو لیڈرانان کرسیو اعمال
پہتو لاوو پہتو پھورسیو اعمال
افیونو اچہ کوس چرسیو اعمال
سیاست دی آخیر کیہ آداب مشکیران
زمانہ ہنون انقلاب مشکیران

طریقہ صاحب نظم اوچے غزلار علاوہ نثر دی بو نیویشی اسور۔ انجمن ترقی کھوارو
مشاعرین گیاو کلام ریکو سوم جستہ انجمنو سیمینارین مقالہ دی راوتائے۔ ۱۹۹۰ جوو
انٹرنیشنل ہندوکش کلچرل کانفرنسہ ہسے چہترارو شیخیقان روایتی اشٹوکان بارا مقالہ
ریتائے۔ مقالہ ہسے ژیرژاوان اوچے ژورگینیان ۲۶۰ اشٹوکان تفصیلو سورا ذکر کوری اسور۔
ڈاکٹر الینا بشیر ہسے مقالو انگریزیا ترجمہ کوری کانفرنسو مقالان مجموعا شامل کوری

اسور۔ ہیه كتاب لندنه چاپ بيتى شير وا روايتى اشٹوكان بارا ہيه مقالا درست دنيا بلونجى
شير۔

محمد چنگيز خان طريقي سڪولار گنى ديها وا دورا پت بو نرم خو، خوش اخلاق، خوش
گفتار وا جم لوئى مشهور اوشوئے۔ ہتوغو پونگو موڑا پليلى كه نو بہتى اسور رين ہوئے تھے
بالكل درست۔ اللہ پاڪ ہتوغوتے تان رحمتو چھاغہ ژاغہ ديار۔ آمين

www.mahraka.com